

四庫全書

集部

欽定四庫全書

仰節堂集卷十三

明 曹于汴 撰

五言律詩

會胡慕東掌科於泓芝驛

匹馬綿山道相逢似夢柯
光儀昔若此世事今如何
不盡班荆意聊占補袞歌
郵亭倘予憶今夜宿烟坡

清明

歲歲清明日家家哭壑頭昔人一旦去存者千年憂野
閣浮雲色田分澗水流九原如可作應更為子謀

與北溪表弟

十載還鄉曲青山竹樹饒旦評新得客花老舊分條未
許嗔濃麗剛成慣寂寥珪璋張仲弟酬對肯連宵

壽陳丈五十

今是知天曰天心果若何麒麟雲裏下貌虎座中多珮
解青萍諾盃殘白雪歌燈前窺俠骨好去靖戎倭

訪劉友不遇和其除夕韻

歲歲除將去乃成千萬年渾淪不歲改機竅幾人研世
謂迎春後情殊守夜前子寅丑異建況味豈應遷

和米山人除夕詩

最是陰陽巧更翻作歲華癡心剛被弄皺面為相加旅
旅思鄉夢城城檢歷家林園猶濯濯誰看此中花

夢遊河津遇蘇石水醒識其狀

甲辰四月十七

夢裏逢知友憐予髭白生草茵相枕藉村釀若生平惜

去馬鞍解傷時襟淚橫龍門岡阜上乍醒使人驚

乙巳七月再遊西園二首

四野青猶昨重來病若加報君空誅草為母惜年華皓
月邀臨榻紅塵懶過家休休還自適到處足烟霞

其二

遭逢亦已足胡不笑顏酖傑士時連袂逸情入放歌三
生由命鑄四壁奈吾何強起加餐飯萱堂雙鬢皤

劉定余先生園亭植杏以肖杏壇招飲花前賦詩

扇賦謝四首

何處園無杏何園杏不花一時成聖蹟千古艷奇葩
爛漫尼山宅芬芳制府家行行來西郭如涉泗洙涯

其二

八九東蒙士傳燈祇一仁有懷窺孔室著意認王春
生趣年年盛天心的的真此時無一酌那不負東君

其三

誰把春容鑄紅粧向曉開爾憐寧待語吾與勿須猜
解

佐犧鐫興知經羯鼓催朱欄塵愛護不遣雨風摧

其四

宴罷七人起簾輿徧挿枝頭令醯海塢恍步上林時一
色色無間衆香香更奇願憑風九萬布散滿天涯

七言律詩

和馮少墟先生勉學詩

尋春莫待賞春時春色何緣過綠枝世路由來曾未險
人情祇是自生癡合天為我方成我順帝不知乃是知

大道見前憑認取相將良友叩明師

平藩太宇宗侯遺詩步韻以謝二首

百丈鯨鯢未戢鱗家家鼯睡大河濱關心獨有天潢客
借箸能迴沙磧春四野燐交遼海卒千年淚落楚江臣
孝陵王氣忻如昨且向月明理釣綸

風動雲流鎮日閒非非寄向蠹魚間從無奇字煩揮麈
覓得玄珠欲破顏臘盡便知冰是水巖居莫愛畫中山
汾陰高士多精語何日青牛曉度關

懷淮陰士民二首

士庶雍雍佐郡時
七年一調不嫌遲
瘵官難補惟心折
落日相催盡淚垂
萬萬千千遮道左
三三兩兩別京師
於今赤子天涯外
目斷長淮無限思

兩考一官疾似梭
成功為問竟如何
從教去後心猶赤
賸枉今番鬢已皤
未報主知顏汗赧
難瞞我處淚滂沱
攝行大治何人也
到此令人感慨多

步韻報盧茂才橋梓併致諸友二首

斷梗飄飄倚日邊每逢貂使夜為年空勞青眼窺親舍
幾向紅塵覓性天到底袖藏辭綬草也知囊乏買山錢
丹心一片從來熱忍過西山酌冷泉

濟濟冠紳集講堂言成鏗韻步成芳主張潘氏教無類
孝義盧家斐有章歲若虛浮空髮短學無實地祗心長
譚馮諸子吾知否夜夜心旌自北翔

謁韓侯廟

辟穀仙人蹤跡杳就烹國士血痕斑翔同孤鳳真奇絕

淚灑千秋豈等閒誰向浮生能繫日未隨腐草便開顏
徘徊相美爾能死不死淮陰市井間

志感

有引

海雲曰不求人知而求天知不求天知而求自
知不求自知而求無知一峯曰保身所以盡忠
也保身所以盡孝也善哉二君之言服之於腐
詩以感之

良朋終日鎮相隨何幸蓬心獲善辭纔道君親雙淚隕

難將冷煖倩人知
塵藩霧鎖單身出
月窟春融一笑窺
到得箇中全掃却
這番認取太初時

村居

薄薄村醪常滿甕
採來野菜亦盈筐
因耽月色眠高嶺
為逐花陰移小牀
每以避寒扃戶牖
未曾觸暑汗衣裳
嵐光竟日相留戀
不識人間有短長

贈馮少墟先生西還得扉字

壬戌冬仲

名賢旬日再言歸
我貴由來知自希
楓陞黃麻需後召

函關紫氣繞初衣斯文終古無加損國史千年有是非
計到家山春咫尺繽紛囊笈滿程扉

步韻謝別太宇賢藩二首

三月河汾賸物華行行行到獻王家清江雲護龍眠穩
碧漢風高鴈陣斜崎路忘勞因盱食塵襟乍淨有春茶
光儀未許溪橋隔柳颭青枝梅放花

牛耳詞壇孰與京留連端為遲行程幾年相憶雙魚赤
一日躬逢四眼明錯落奚囊剛喜極咎嗟聲緯却愁生

全憑一醉澆離緒到向東人呼酒觥

龍逢塚

下馬高墳淚欲零忍聞忠蓋被嚴刑秋風慘慘天為老
夏歷茫茫骨尚馨一死猶期成主悟九州豈意共身傾
英魂彷彿來相囑莫道吾王不聖明

魏豹城

野老溪邊說魏侯荒原曾此樹瓊樓秦王殿上珠光照
薄后宮中貴氣收故壘惟聞殘鏃出遺溝猶自淡烟浮

興亡千古堪憑弔何事蜂衙喧未休

贈別徐明衡天部以請贈薛西原先生得謫

南州高士出皇都陰雨三旬滙若湖一旦銓郎辭墨綬
滿朝臺諫伏青蒲爾懷聖主恩猶渥衆美西原德不孤
再弼盛明他日事眼前吾道在匡廬

和呂豫石天部倣學詩十首

睿思講罷講何思請更參詳率性時膝下瞻依寧俟慮
井邊怵惕那容遲也知研究堪窮髓絕勝踈浮但撩皮

祇是不思原聖脉入門爭可讓些兒

等閒莫把意為心纔說尋心無可尋固在一腔難問際
雖然萬備不容針匪憑軸在空輪飾覓得丹來徧地金
千古齋心顏氏子聰明黜盡只潛沉

古德相傳只此明十分明是十分行憤昏決事終成暝
想像為知僅是名明照應須莫浪指躬行切忌不完成
醒來幻夢一齊歇若個為明若個誠

身外遊絲總贅疣營營何事不如休可憐暇日翻成擾

却把直腸硬作鉤甘飲自捐著屐血錦衣人笑頂冠猴原
來至足屬吾道塵網牽人可盡勾

勿用區區嘆德孤茫茫寧匪盡人夫試詢乾父皆男也
可道街氓不聖乎有我一堂分肺腑同人千聖點頭顙
陽和未到氷難解願挈良朋共勉圖

世上何人號最貧裘裝七尺小為人旁聯六合斯真體
貫徹千秋是大身纔割禽魚便是痿不疼荒徼豈名仁
只休封閉如蝸縮縱有高談未許真

眼前突兀聳尼山終日徘徊盍去攀起念便分生死介
是誰能立獸人間殷殷防錯常詢路戰戰臨深為過關
老我流光增鄭重中宵耿耿未能閒

吾性原從未有孩五常百行甫成才太初太始須叅也
一欲一為可漫哉身濯江流纔是潔眼迷跬步未云開
曾觀鄉黨十篇否檢點衣裳飲饌來

莫訝崇高聖與神為神為聖甫為人希天即在希賢日
由義難於行義循灑掃魯聞神所入心精即是聖之真

果然此道一而已孟氏當年既示津

每詫儒紳見有邇得詩深喜已窺全明幽合貫方成世
費隱都融可論天進學還須獨有得殫人每以故相傳
元公試向詢無極不語只消抹去圈

欽定四庫全書

仰節堂集卷十四

明 曹于汴 撰

五言絕句

省躬詩

燕子語梁間
天籟各自發
家童勿垂簾
出入任飛越

又

風從水上過
文成風不知
水亦不自文
觀者乃文之

又

人信勿自信人疑還自疑不疑不成信闇然為襟期

又

人不幸不及相看成自驚莫訝醉人醉未飲不為醒

又

蒿萊誰不厭斲盡又還生田不茂黍稷未許不青青

又

聖人時而言一發千鈞弩終朝審其機含章緘不吐

又

小鑑鑑以面巨鑑鑑以身不比明月光豈識乾與坤

又

或計在一時或計在一世或計在萬年經營應自異

又

我全而人毀毀者當自怒而我乃怒之芸人忘其故

又

利根千萬大漆堅細若絲誰知絕利日剛是利生時

又

鑑空水之止纖塵不捨光人心塵無許頓爾成昏茫

又

血氣相驅役真成傀儡身不知伏火處那知已成焚

又

宿愛不能斷宿嗔不能斷營營堦序間何時登彼岸

又

請益居其虛受益居其愚請益而益至真能不怒無

又

畫史先盤礴一揮敵化工萬事未當前胡不虛其中

又

孟子善養氣此氣即此理稟氣人人知理則遠言取

又

萬人各一生萬生各一遂聖人遂萬生於已取不匱

又

遇蘭馥我衣遇棘刺我裳人生隨所遇何必苦相傷

又

御人與御事難易迴然分人心不我洽吾事亦遭迤

又

世變人崇鬪几筵列戰鋒雞肋誰我弱箝口莫相衝

又

昨夕塵情濁恣恣結不舒夢中馮伯子命我勿區區

又

良賈以虛殖殖多更遽藏祗緣寸銖兩囊篋日周章

又

不百鍊不勁大任阿誰舉大道大如許衆生衆如許

又

舉世俱予聖千年顏孟無向明爭似暗明便輟功夫

又

何不學幼子笑罷忘其喜不風猶作波人稱為禍水

又

天大不漏細羅三垣列宿不難大如天抑恐多疎漏

又

喋喋以益人疑於炫所有人方陳其益雖逆且順受

又

過不可不悔一悔便消釋藥過病還生撼搖苦此鬲

又

恩過翻成怨非關怨者尤陽和陰不節炎夏竟何流

又

休因得意處忘却懊懷時自吐寧堪食剛腸莫再移

又

偶睹醜人醜歸來淚暗彈醜予無處著為爾何成寬

又

行不離堦前言乃萬里去負儋果幾何千鈞勿浪語

又

困來寧退休倦容勿對客勿易吐肝膽而令辭氣迫

又

德義早安排十三年前語今日初度日慚愧汗如雨

又

過喜氣多揚過憂貌亦畱理情如調羹味過詎堪食

又

尋常躡徑草容易撲流螢怙強終不覺爾弱乃相陵

又

長呼據竿頭他人焉置足環瞻匪爾榮將以爾為鵠

又

陽過常畏人陰過不畏己人目當其麗吾目當其鄙

又

小怒不能懲大怒且相襲大怒旬日連小怒時刻戢

又

羊腸鮮覆轍密語多興戎風波翻齒頰水炭羅心胸

又

勿恃沾沾恩恩為怨之府勿恃煦煦親親為疎之藪

又

貞士不易悅曲士不易結胡為乎營營空爾成勞拙

又

逢比榮萬年榮辛辱千古弔罷莫談忠慟淚方如雨

又

治世非一手亂世非一足南渡主多冤羣工俱食肉

又

磯流嚮滂湃風樹影參差神氣清寧日聲容和順時

又

參芎自不惡藜蘆亦何尤丈夫同氣味白首願同遊

又

螢火未成日不信草能飛望夫軀化石石軀有無知

又

家有軒轅鏡鏡貌分於此去者影常留來者胡以竢

又

漏語亂之階轉喉若發機機動靡不走促膝成啞臍

又

謂我不如斯人其誰我諒是何人之殉不憐我之喪

又

蟻鬪如雷震病耳亦時聞人誰同此耳相述徒殷勤

又

周行松桂羅狹徑多蓁莽遇莽方迴足何如詢路口

又

燕居如對客客至不更容倉惶多掩飾藉是以自攻

又

怒毀成愎諫喜譽若爭憐借將領下氣增取面前妍

又

乍面成乍照易諾旋易悔孰與少踟躕猶令直道在

又

誰將一粒珠棄之於中野誰將一寸長人前誇詡者

又

吾將益人善因之攻人瑕區區亦疏耳如煮水灌花

又

陽剛散之始物生肇自坤石冷能藏火火烈祗成焚

又

折旋不足處百拜盡成虛臧寸不為大凜凜貫終初

又

人情誕固誕評章密似毛評人如評鬼雙淚落青袍

又

大濟肇於忍大懟肇於忍一忍不復辨剛道是愚蠢

又

先朝肇大禮羣議競紛然文成問不答聊爾咏青天

又

千里難一師百拜難一語
詬言感如飴相成出相齟

又

口虛而內實欲入閉之門
空洞絕伎倆是為百益原

又

天雨之潤禾傾盆不如細
侈口相開陳知應匪求濟

又

知人真不易
諮詢失亦頻
勿謂憑高客
勿謂聽密人

又

人亦何容辱人亦何容欺我否而人可貌諾而中攜

又

义手成經濟揖授何森然歆側談條理沉醉說醒言

又

眼淨微成巨三年貫虱心羊羹與雞距戈甲起繽紛

又

制念如縛鹿一排而一觚無念乃無縛正襟墮支體

又

雄辯如求勝直窮亦似爭纔勝負者遠纔爭大道崩

又

劉戒釋文義潘不議論予無乃談學聖勿越各身軀

又

何事須明心神通無更有一朝心其心宇宙在吾手

又

何事賞巴曲何事唱陽春既成立語式更得聽言人

又

時或率天性分明大道行無端翻自悔苦媚世間情

又

意左莫投足言違急斂脣訾人如齒劍揚已如投焚

又

諸有不能無諸無不能有靈性一何靈無無仍有有

又

些個失人意愁腸百疊縈却詫元城子梅州鼾睡聲

又

談忠多負主論孝未酬親
响濡才似髮相負便生嗔

又

不作井中泥輒鳴牀上琴
匡人何予有况為廢謳吟

又

惟敬能生樂恣睢成悶懷
尋常莫造次戎好笑中來

又

支言亦有根根深不在口
任爾三百緘根動口自剖

又

爾窺事遲遲喜怒勿遽發爾處事疎疎經理須密切

又

卒然輒舛錯檢點已千里改是胡以預造次必於此

又

大木充棟梁全帛美裳衣若不中繩墨環觀嘆奇稀

又

飛雲流遠浦旭光盪風林去住儻不滯可擬達者心

又

一字歎於中四座俱回首惕兮敬靡忘勿以為細咎

又

無謂楚可疑趙孟自坦坦無謂漢可信留侯戈已返

又

知幾者不辱况今辱相續徵色不自喻是之謂走肉

又

一水滿不容一水滿欲施海若乃汪汪二水小如卮

又

何故多遺忘知因心不存水澄物自照垢遠鑒靡昏

又

心胸藏釁卻譽之以為譏岐路相違左合之乃成離

又

戚休掣電來得喪迅雷起心澄自不搖憑言了生死

又

養氣如養虎虎哮制則難養心如養龍龍變以能蟠

又

天下極難事取土益高陵千秋華嶽頂帝座幾人登

又

保心如保印印去能吏拙事心如事親常令安且悅

又

事不問巨小身在思有濟庸庸偶其間何殊匏之繫

又

以言教者讐以言教者訕几席笑談間好師成大患

又

常定亦常覺常覺亦常定泗濱獲要言吾以止吾性

又

吾亦完其我天壽我何關人毀與人奪似隔幾重山

又

有物彌天地至密至恢恢放非由近去卷不遠方歸

又

宗聖終無愆遵王道如砥人心真聖君從心何不理

又

不識嚴僮僕能無畏影衾心開雙目朗匝地鬼神森

又

心意由來別心性亦分明不窺真性面終是氣縱橫

又

傑人千仞壁卓見亦橫中方識不聞覩穆然洵聖功

又

事因忙處錯中道在從容擬議為言動免令愆戾叢

又

止止還止止休休坐馳兀兀固在此浪浪將何之

又

魄我魂仍我夢胡不我由夜夢原從晝云何不靜修

又

聞雞頻問夜非是愛辛勤老至光陰少那能不惜陰

又

匪擬人相重不嫌人我輕察言知不足從此日兢兢

又

古人惜寸陰寸寸必有事古不專誦書所事果何事

又

名利真成崇英雄奈爾何清江平似席倏忽起風波

又

問路非行路年年在戶庭果然行路客問罷即登程

又

不欺人功淺功深絕自欺自欺寧易絕還在欺人時

又

何處窺剛德應於衆眦時初心原不惡底事為人移

又

不憚於巨禍不怵於殊榮不眩於久暱白首鮮能行

又

飲毒十年前毒發十年後智人慎舉七惜人悼成疚

又

日照不擇地雨潤無遺草吾心藏仁機嫉惡亦能槁

又

飽食卧北窗多少恩難補征人捍邊陲農夫勞畝畝

又

利榮無冀想推挽絕偏私杳杳高風在執鞭我願之

又

請看鼓楫人江海如平地由來此世途各自分難易

又

莫視聖者高自高更局促暑葛寒以綿人人贊化育

又

天心最憎機人心能照機試觀海上客何事不忘機

又

積風風乃厚強信終成疑相逢纔半面便道過鍾期

又

鄉愿萬尋坑白頭跳不出圖個世人稱年年囚鬼窟

又

點檢從前事感應如桴鼓勿云方寸幽天公於此睹

又

常憑未發天好令直如弦忽忽初念轉照照却惺然

又

朝暮相煎急誰人會個休通來一寸血點點逐浮漚

又

著力因求得得後何庸力無力却有力綿綿自消息

和鄒南臯先生寄示三詩

土坼田分畛水消水共池怪來關切甚原未隔毫絲

右共一家

耳目若可銘見聞何所住春色滿乾坤畫樹非真樹

右文字障

不道西山高却道日將晏誰知夾日烏陽光猶自爛

右四大假

劉冲倩誕初子錫朋

劉子今方赤相看不爾如他年年似我憶取爾之初

劉冲倩定嗣長子錫蕃

主器遵而祖荆花好振先彞倫天叙就而祖即而天

劉冲倩誕次子錫履

多孫若祖忻雙郎忻若父有弟忻若兄異日三無負

七言絕句

獨坐

蓬萊弱水是何處悠然獨坐小齋中
分明天地共浩浩
豈必烟海逐空濛

和友講道

道無堂奧亦無門何處入來何處存舉足求門足便是
眼前淪渾更無痕

賞牡丹

花前逸興欲傾盃為問此心何處來物理若還不我與
等閒那得笑顏開

坐思

萬軍接刃鬪紛紜旗鼓惟聞將帥尊若道此心更有主
又令將帥主何人

吳安節先生貽詩步韻以謝

茫茫今古道常存眼底拋除誰是尊
一座堂皇天樣大無端又向小分門

夏庭鎖斧亦遭逢俎豆關祠代代同
却道頭顱剛直甚悔將主過博臣忠

新月

訪客登臨百尺樓纖痕遙共薄雲流
如輪皓魄分明在舉世爭言月似鉤

癸丑村居雜詩

東鄰西舍總淳龐
後圃前廳盡植桑
莫道農家成寂寞
茂林好鳥奏笙簧

坐卧高樓萬戶低
山屏闌楯兩相齊
眼前塵障開除盡
暮雨朝烟入品題

澍雨昨宵漲小池
曉來庭院綠參差
兒童報道蔬堪摘
便好邀賓賞歲時

得請歸來恩許閒
細窺書卷飽看山
四郊却道無禾黍

又為饑人不解顏

五旬無雨壠苗枯
少女誰家挽轆轤
也愛深閨幽靜好
半因饑餒半田租

才愁溽暑忽秋涼
人世誰同天運長
好展襟期酬令序
四山雲物曉蒼蒼

高臺四望野連天
風月於茲豈有邊
三尺匡牀紛計算
還知世界幾千千

田叟邀來為解蓑
飲君濁酒為君歌
莞然一笑還相問

昨夜月明詩幾多

村小不盈數十家
迴迴相見問桑麻
稚兒未任犁鋤力
也向溪頭解種瓜

聞報書懷四首

丁巳

鈍質生來故不奇
科名官位總逾涯
若人剛好投閒地
猶費夕郎夜草辭

鄭重多賢輔聖君
不才自合老烟雲
兒童課罷書堂寂
種竹栽花日又曛

利鎖名韉久若遺無端猶爾浪猜疑而今想在相拋却
正是茅簷穩睡時

塵世繁勞不上肩山中長夏日如年千秋未了遺編在
且喜蠅頭也會看

初任司理到任日吏用印報云陞授吏科給事中
虛套取喜何必乃爾走筆題其上

休飾虛章報吏科縱成真取便如何眼前羞作瞞心事
莫把津華覲望多

梁燕重來二首

行取候命

萬里都門春復春，雕梁燕壘又更新。
呢喃相向如相訝，不是燕人是晉人。

年年作客客華堂，歸燕殷勤話暖涼。
飛過回廊還對語，主人何事鬢成霜。

藤

嫩枝柔幹倩相扶，未信終成矮地鋪。
當是老龍離玉闕，昂頭藏角隱平蕪。

竹

偶因月上橫疎影不為霜來發勁枝
休把貞操漫相擬還須些個自然時

迎春花

輕黃不似首春時果是青青但此枝
欲識花無與花有且言春去竟何之

葵花

自白自黃還自紅賞不加喜折不恫
若教著意才傾日

花若能言應笑儂

榴

共道榴花結子多
百花堦下共森羅
滔滔萬派歸滄海
胡不中原絕水波

落花

凭欄遊冶惜芳菲
陣陣風來片片飛
多惱多情總向外
本來纔著便忘機

咏垂楊似座中友

為甚枝枝向下垂不剛不勁耐風吹相逢為爾頻傾酒
記得十年贈別時

題北園十五首

楚弱劉強東逝波銅山金谷總消磨啼鶯莫向窗前枕
無限榮華正夢柯

七尺身軀一粒沙年來病豎苦相加吾將一笑攀明月
白玉京中別有家

昨夜狂風萬水號如從三峽聽江濤垂雲隔在應憑取

飛入天門興轉豪

風高猶自怯衣單
華嶽峯頭四望寬
萬國洪鑪悲正熾
銀潢瀉却與清寒

採藥時從陌上還
牀頭欹枕看青山
一腔熱火風吹去
欲向忙人賣個閒

夢裏分明玉帝旁
騎龍駕虎任翱翔
迴頭世界些兒大
不是爭蝸是怒螳

萬里黃河一線流
茫茫大地水中漚
非非是是莫相聒

一夜西風欲白頭

石橋橋畔濯滄浪高柳陰濃足午涼
野老班荆情共適
無人識是瑣垣郎

累累高塚傍河涯古碣苔封半欲歌
惟是銀璫曾不拜
百年處處口為碑

時遊張氏墳

十里郊原信步遊每逢嘉樹且休休
旌旗却憶長安道
瀟灑終應此日優

隴頭小坐說當年
逐牧隨農過綠阡
人是舊人窮亦得

烏沙難道漆同堅

半生炊黍未全醒
羸體相看便不寧
非是貪官非愛壽
個中不了為惺惺

春老園花秋近枝
黃昏相對淚交頤
如天事大關情切
惟有清風明月知

孟水昨宵夢化金
靈臺帝主室吾心
楊家夜却尋常事
蟻穴能令江漢深

岸裂瀾狂漲若湖
且沉且起賴殘壺
中流力盡波仍急

尼父空中笑欲扶

避暑姚館漫題

乙巳

邸報傳來莫嘆呀長安從昔此紛拏
飛霜墮雪皆天意到得東風自放花

草有千般花萬叢形形色色也難同
負心唾面都由彼不向人間競楚弓

千年華表草中埋八百錢翁亦去來
拋却金環總一律儘他二豎莫徘徊

南遊八首

廬山面目何為真我來問取山頭人
山人住慣等平地脉脉無言鋤白雲

為觀瀑布登高閣懸流百仞空中落
山僧不見雪花飛指點巖頭說旱涸

時瀑無水

文殊臺上惟月明水中有石聲鏗鉤
這番公案憑誰剖還是石聲是水聲

白鹿無踪古洞幽仍登絕嶺豁雙眸
紫陽笑指條山曲

一樣淙淙湧碧流

千丈神妖繫鍊柱年來逃向靈臺住憑遣千兵擒不來
不持寸刃驅將去

一溪綠水一林松五柳先生宅此中天遣生成晉處士
非將飢餓博高蹤

佛子金身三丈五袒肩垂手觀下去莫恠當年著眼高
等閒豈識羣生苦

訪仙臺上石崔嵬人道餐霞去不回果向深山更深處

溫良何故進丹來

會堂和楊晉菴先生勉學詩七首

此道何時不大明
青霄無奈片雲生
幾迴欲掃掃不得
不掃憑誰代若行

為是為非我自明
每從暗裏淚痕生
會堂度度得良藥
欲策駕綿勉強行

同此天真同此明
宛如一鏡羅羣生
煩君提我迷途裏
沂水河邊好共行

還得原來恁地明無邊真趣自生生何須著力相防檢
水自流兮雲自行

眉宇薰人乍欲明須防鄙吝別來生利名根蒂縛人急
口說難憑且去行

頓解蓬開未是明譬如擊石火光生可憐擊罷依然石
到此令人猛欲行

果然明盡却無明到得真明萬照生千古良知孩提子
孩提剛是任天行

鳶飛魚躍

鳶魚吟罷此心開
色色如斯莫更猜
窗草驢鳴同意思
古人纔是誦詩來

和張霽春談碁詩

茫茫今古大碁枰
興敗輸贏局局爭
畢竟有時雙歇手
迴頭一笑枉生情

仰節堂集卷十四